



*Tòr e barca arción
cun malincunía
dal nòs balcon
i è sbrissigaa via.*

*Adèss gh'è quattru létri
se tira bréva o vént
i végn alt dii métri
tücc víscur e cuntént.*

*LÜGA gh'è sül stéma
dala róssa bandéra
Lü-Gan-dria inséma
al par gnanca véra.*

*Rüga e früga
in tücc i armádi
salta fö ul Lüga
chéll véru dal stádi.*

*Cüsii l nümar dés
süla máia dal Luttròp
anca un gandriés
al tira cumè n s'ciòpp.*

*In Piazza Nisciör
gol e lampión rótt
gamb süduu e cör
máia cuntra biött.*

*Dó giácch i fa na pòrta
triü corner un penalty
anca se l'è stòrta
fém un mücc da salti.*

*Ul camp tròpp strécc
sa giüga da spunda
la bala süi técc
pö nal lagh la dunda.*

*Répicch sül müir
cul gèss dó riigh
tra l ciár e l sciür
che Super League.*

*Municípi e scöra
gh'è pròpi pü nagótt
chi che végn da föra
l'è par bév un gótt.*

*Túrnum mia indré
nüm sém i Tòr
Gandria l'è un quartié
ma cui bal d'òr.*

*Incöö ul Lüga
l'è sül nòs balcon
in sögn al giüga
ammò al balón.*

*LÜ l'è pròpi lü
Lügán al vör dí
ma ul GA che gh'è sü
l'è Gandria... par mí!*

